

La'o Hamutuk

Institutu Timor-Leste ba Monitor no Analiza Dezenvolvimentu

Rua do Salmão, Marconi, Fatuhada, Dili, Timor-Leste

Tel: +670-3321040 ka +670-77234330 (mobile)

email: laohamutuk@gmail.com Website: www.laohamutuk.org



28 Julu 2026

Sua Exelénsia Kay Rala Xanana Gusmão

Primeiru-Ministru RDTL

Gabinete Primeiru-Ministru, Díli

Kópia ba:

1. Ministra Finansa;
2. Ministru Planeamentu no Investimentu Estratéjiku;
3. Ministru Komérsiu no Indústriá;
4. Ministru Agrikultura, Pekuária, Peska, Floresta;
5. Vice Primeiru-Ministru no Ministru Turizmu no Ambiente;
6. Vice Primeiru-Ministru no Ministru Habitasaun no Dezenvolvimentu Rural.
7. Média no públiku

Asuntu: **Apresiasaun no Rekomendasaun Estratéjika ba Deklarasaun Estratéjia Orsamentál 2027**

Sua Exelénsia Primeiru-Ministru,

La'o Hamutuk hatu'o apresiasaun ba Governu tanba publika Deklarasaun Estratéjia Orsamentál 2027 antes submisaun Orsamentu Jeral Estadu ba Parlamentu Nasionál. Inisiativa ida ne'e hatudu komitmentu atu hametin planeamentu fiskál médiu prazu, aumenta transparénsia no loke oportunidade ba partisipasaun públika iha formulasaun política fiskál. Introdusaun mekanizmu hanesan *Future Estimates, Policy Priorities Process* no *Mid-Term Fiscal Framework* representa avansa importante atu liga prioridade política ho planeamentu no alokasaun rekursu públiku.

La'o Hamutuk konsidera katak planeamentu médiu prazu tenke sai instrumentu estratéjiku atu orienta transformasaun ekonomia Timor-Leste, la'ós de'it atu define prioridade despeza públika kada tinan. Planeamentu ida ne'e tenke orienta investimentu produtivu, sustentabilidade ambientál no fiskál, kriaunsaun empregu, inovasaun, produtividade no jestaun responsavel ba rekursu naturais, hodi asegura katak desizaun orsamentál ohin la estraga kapasidade dezenvolvimentu ba jersaun sira tuir mai.

Maski nune'e, ami konsidera katak dokumentu ne'e sei presiza reforsa liu tan atu responde ba dezafiu estrutural sira ne'ebé Timor-Leste hasoru. Dependénsia aas ba Fundu Petrolíferu kontinua sai risku boot ba sustentabilidade fiskál, enkuantu estratéjia diversifikasaun ekonomia seidak akompaña ho prioridade investimentu, roteiru implementasaun no indikadór rezultadu ne'ebé klaru. Nune'e mós, ligasaun entre planeamentu no ezekusaun orsamentál, reforma tributária, reziliénsia ba mudansa klimátika, governasaun públika no

jestaun sustentável ba rekursu hotu, liuliu marítimu, presiza sai parte integrál husi estratéjia fiskál nasaun nian.

Bazeia ba análise ida ne'e, La'o Hamutuk hakarak hatu'o rekomendasaun estratéjika sira tuir mai:

1. Hametin sustentabilidade fiskál liu husi redús dependénsia ba Fundu Petrolíferu, estabelese regra fiskál ne'ebé klaru, hamenus despeza desnecesáriu reforsa reseita doméstika no asegura utilizaun rekursu públiku tuir kapasidade ekonomia nasaun.
2. Aselera diversifikaun ekonomia no dezenvolve Ekonomia Azul Sustentável, ho investimentu prioritáriu iha agrikultura, peska sustentável, akuakultura komunitária, turizmu ecolójiku, indústriia transformadóra, no enerjia renovavel. Política Ekonomia Azul tenke fundamenta iha sustentabilidade ambientál, soberania ba rekursu marítimu, governasaun transparente, valor akresentadu iha rai laran no benefísiu ne'ebé distribui ho justisa ba comunidade Timor-Leste.

La'o Hamutuk mós hakarak hatu'o preokupasaun konstrutiva katak dezenvolvimentu Ekonomia Azul tenke halo ho kuidadu no bazeia ba evidénsia sientífika. Iha nivel globál, iha tendénsia atu aumenta presaun husi korporasaun multinasionál ba kontrolu rekursu mariñu, inklui proposta kona-ba *deep sea mining* no atividade estrativa seluk iha tasi laran. Atividade hanesan ne'e bele lori risku ba biodiversidade mariña, ekosistema tasi, kontaminaun husi substánsia tóksiku, seguransa alimentár no subsisténsia comunidade kosteira sira nian moris. Tanba ne'e, ami rekomenda atu Timor-Leste aplika prinsipiu estratéjia ne'ebé prudénsia, halo avaliasaun sientífika independente, garante konsultasaun públika efetiva no asegura katak comunidade kosteira sira la sai de'it observadór ka eskluídu, maibé sai partisipante no benefisiáriu prinsipál iha jestaun no utilizaun rekursu marítimu.

3. Hadi'a efisiénsia despeza públika liu husi reforsa planeamentu, ezekusaun orsamentál, monitorizasaun projetu no sistema aprovizionamentu públiku atu hamenus atrazu, inefisiénsia no kustu ne'ebé la nesesáriu.
4. Reforsa governasaun no transparénsia, inklui transparénsia iha kontratu públiku, propriedade benefisiária, mekanizmu anti-korrupsaun no partisipasaun efetiva sosiedade sivil iha monitorizasaun polítika no orsamentu.
5. Implementa reforma tributária ne'ebé justu, inklui ho preparasaun institusionál, edukasaun públika no medida atu proteje família no negósiu ki'ik sira ne'ebé vulneravel.
6. Integra mudansa klimátika, Ekonomia Azul Sustentável no jestaun ekosistema mariña iha planeamentu fiskál no planeamentu médiu prazu, hodi asegura katak investimentu públiku aumenta reziliénsia klimátika, conserva biodiversidade, proteje rekursu tasi no rai, no aproveita oportunidade atu asesu fundu internasionál ba adaptasaun, mitigasaun no konservasaun ambientál.

La'o Hamutuk fiar katak Orsamentu Jeral Estadu 2027 tenke sai instrumentu estratéjiku atu transforma estrutura ekonomia Timor-Leste ba modelu ida ne'ebé sustentável, inkluzivu no resiliente. Transformasaun ida ne'e la depende de'it ba aumentu ka hamenus despeza públika, maibé depende ba qualidade desizaun polítika, disiplina fiskál, governasaun di'ak no investimentu ne'ebé fó prioridade ba setór produtivu sira.

Ami rekomenda atu Timor-Leste la kontinua modelu dezvoltimentu Ekonomia Azul ne'ebé depende ba atividade estrativa. Esperiéncia internasionál hatudu katak modelu ne'ebé fó prioridade ba estrasaun intensiva rekursu naun-renovavel dala barak aumenta vulnerabilidade ambiental, dezigualdade sosiál no dependénsia ba kapitál no teknolojia estranjeira. Iha sorin seluk, Timor-Leste iha oportunidade atu dezvoltolve modelu ekonómiku alternativu ne'ebé bazeia ba produtividade, inovasaun, renovabilidade, sustentabilidade no valor akresentadu iha rai laran, atuálmente Timor-Leste iha dependénsia liu ba importasaun falta iha kapasidade produsaun lokál sai risku estratéjiku ba ekonomia nasional, nune'e iha urjénsia ba transformasaun liu husi investimentu agrikultura sustentável, peska responsavel, turizmu komunitáriu, indústrria transformadóra no enerjia renovavel. Estratéjia ida ne'e bele hametin soberania ekonomia, proteje patrimóniu natural, garante partisipasaun comunidade lokál no kria benefísiu ne'ebé sustentável ba jersaun agora no futuro.

La'o Hamutuk kontinua pruntu atu kontribui ho evidénsia, análise independente no rekomendasaun política atu suporta Governu no Parlamentu iha dezvoltimentu política pública ne'ebé transparente, responsavel no orienta ba interesse povu Timor-Leste. Ami fiar katak diálogu, kooperasaun no planeamentu estratéjiku ne'ebé bazeia ba evidénsia sei sai baze importante atu realiza dezvoltimentu nasional ne'ebé soberanu, justu no sustentável.

Ami ható'o obrigadu barak ba atensaun no lideransa Sua Exelénsia nian, no espera katak rekomendasaun sira ne'e bele konsidera iha preparasaun no implementasaun Orsamentu Jeral Estadu 2027.

Ho respeito aas,



Marta da Silva
Koordenadóra